

佛说月光菩萨经

宋西天三藏朝散大夫试鸿胪卿明教大师法天奉 诏译



南無本師釋迦牟尼佛

说 明

本简体校正版《佛说月光菩萨经》电子书，根据《乾隆大藏经》宋元入藏诸大小乘经，第 0847 部，宋西天三藏朝散大夫试鸿胪卿明教大师法天奉诏译《佛说月光菩萨经》原藏影印本校正，句读仅供参考。

本电子书是免费结缘品。特此说明。

仁慧草堂

二〇一八年九月

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处结祥云.
诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

佛说月光菩萨经

宋西天三藏朝散大夫试鸿胪卿明教大师法天奉 诏译¹

如是我闻：

一时，佛在王舍城竹林精舍，与大苾刍众，而为说法。时，舍利弗、大目乾连前诣佛所，五体投地，礼佛足已，白佛言：“世尊！我等今者，不忍见佛入于圆寂，而于此时先入灭度。”

尔时，众中有一苾刍，合掌向佛，而作是言：“世尊！舍利弗、大目乾连有何因缘，今于佛前先欲入灭？唯愿世尊为解众疑。”

尔时，世尊告苾刍言：“汝今谛听，吾为汝说。舍利弗、大目乾连贪、瞋、痴等诸漏断尽，所作已办，梵行已立，不受后有，非唯今日先欲入灭。于过去世，北印度内，有一大城，名曰贤石，长十二由旬，广阔亦尔。彼有国王，名为月光，寿四万岁，有天眼、宿命通，身色端严，诸相具足，光明照耀，如天满月，所住²之处，不假灯烛日月之明，故号月光。统领四洲六万八千国土。时世丰熟，人民安隐，金银珍宝，饮食衣

¹ 大正藏：西天译经三藏朝散大夫试鸿胪少卿明教大师臣法贤奉 诏译

² 大正藏：往

服，象马车乘，悉皆盈满。于城四门，皆有楼阁，户牖轩窗，俱用众宝而为严饰；街巷道陌，扫洒清净，竖立幢幡宝盖，真珠瓔珞。复有沈香、栴香、梅檀之香，微风时起，吹其香气，周徧国城，车马行人，不闻秽气。处处复有华果树木，多摩罗树、迦尼迦啰树、无忧³树、贝多树、娑罗树、帝罗迦树、龙华树、末俱罗树、阿底目伽树、播吒罗树繁郁茂盛。鸚鵡、舍利、迦陵频伽、俱计罗鸟等，于诸树间，作微妙音。于城内外，流泉浴池，常出好华，优钵罗华、俱母那华、奔吒利迦华等，如是富贵，种种装严。”

佛告苾刍：“尔时，月光天子于市肆街巷及城四门，堆聚金银珍宝、象马车乘、饮食衣服、卧具医药、种种庄严之物，即击金鼓，告令众人：‘月光天子以种种财物，普施一切，随意所须，求者相给。’”

“尔时，南瞻部洲一切众生，皆至王城，求其所施，无不丰足，得大富贵，无一贫乏及徒行者。”

“尔时，月光天子复自思惟：‘虽诸众生无有贫乏，对我所用犹未齐等。’复以细妙衣服、

³ 大正藏：优

最上珍宝、头冠瓔珞、卧具饮食等，施诸众生，富贵庄严，皆如月光天子身；城邑宫殿，楼阁园林，种种严饰，如忉利天。

“有七十二百千那由他人，常止此城；有二千五百大臣，有二辅相：一名大月、二名持地，容貌端正，福德淳厚，智慧深远，高才博识，恒以十善，化诸众生。

“是时，大月于夜睡眠，而作一梦，王戴天冠，变黑烟色，复有鬼来，就王头上，夺冠而去。作是梦已，忧惶惊惧，恐有不祥而自思惟：‘我王慈愍，惠施一切，求者不违。必有恶人，来乞王头。’作是念已，即用七宝，造一宝头，如有乞者，以此代之。

“时，持地辅相亦作一梦，见月光身，四体分散。即召婆罗门，占梦凶吉。婆罗门曰：‘此梦甚恶，必有远人，来乞王头。’持地闻已，悲泣感伤：‘云何我王，有斯大祸？’

“尔时，一万二千五百亲位大臣，俱作恶梦，幢幡倒地，金鼓不鸣，恩爱别离，悲啼哭泣。如是梦已，共相议曰：‘王若不吉，一切众生，谁为救济？我等云何而得安隐？’

“时，月光天子又告大臣：‘尽我寿命，施

于众生，不得间断。’

“尔时，香醉山中有大婆罗门，名曰恶眼，聪明多智，善解技术，知月光天子于城四门大开施会，击鼓宣令，普告四方：‘求者供给，而无乏少。’‘我今往彼，乞于王头。’作是语已，下香醉山。

“山有天人，知婆罗门来乞王头，悲痛伤叹：‘苦哉！苦哉！此王心怀慈愍，利乐群生；如若命终，世间薄佑。’作是语时，天地昏黑，日月不现，泉井枯干，暴风卒起，吹砂走石，树木摧折，大地震动，有如是不祥之相。

“去城不远，有一仙人，身具五通，名弥湿嚩弭怛啰，与五百眷属，常以慈愍，护念众生，见此征祥，甚怀忧恼，告摩拏嚩迦曰：‘必有灾祸，临于民主。我等云何而为救护？’虚空中紧那罗众及诸天，皆悉下泪，如降微雨；一切人民，心怀惊怖。

“时，恶眼婆罗门将欲至城，护城天人诣月光天子前：‘今有恶人，从香醉山来，怀杀害心，欲乞王头，不得听之。宜保爱自身，固安圣体。’

“王既闻已，心生踊跃，叹言：‘善哉！令我圆满檀波罗蜜。’

“时，恶眼婆罗门即入王城，守门天人见婆罗门神情丑恶，隔住门外，终不放入。时，月光天子知彼来至，不放入城，即告宰臣大月：‘有婆罗门从香醉山来，欲见于我。令彼门司，不得障碍。’

“大月受教，白守门天人：‘即令放入。’

“大月见已，问婆罗门曰：‘汝来至此，有何所求？’

“婆罗门言：‘我闻月光天子慈愍有情，设大施会，若有所求，一切无吝。今来至此，欲乞王头。’

“大月告言：‘婆罗门，王头脓血所成，终归烂坏，汝今乞得，有何所用？我有七宝头，复有种种金银珍宝，俱奉施之，乃令子孙永得大富。’

“婆罗门言：‘我本乞头，非为珍宝。’

“时，二大臣啼泣雨泪，悲痛忧恼：‘我等云何得免斯害？’

“时，婆罗门即诣王前，见已顶礼，住立一面，合掌白言：‘闻王慈愍，普施一切。我今远来，只乞王头。愿垂慈愍，欢喜布施。’而说偈言：

菩萨志求无上智 安住最胜清净法

愿垂慈愍速舍头 圆满檀度波罗蜜

“时月光天子，即起合掌而说偈言：

父母所生不净身 汝求我头欢喜舍

满尔本愿称心归 令我速成菩提果

“说此偈已，白婆罗门言：‘勿嫌我头骨髓脓血，皮肉相连，无有清静，而即施之，满汝本愿。’

“时，婆罗门心大欢喜。王欲截头，即去头冠。是时，南瞻部洲一切头冠悉皆落地，人各惊惶。辅相二人，不忍见王舍弃身命，即于彼处，自尽其寿；以善根力，生大梵宫。

“时，菩摩夜叉于虚空中高声唱言：‘苦哉！天子！今将命终。’

“复有百千亿人奔诣王宫，啼泣下泪，伤爱别离。王即说法安慰，令发道心。

“婆罗门言：‘王若舍头，宜于净处。’

“王即告言：‘我有一苑，名摩尼宝藏，华果茂盛，流泉浴池，种种庄严，最为第一；于斯舍头，汝意云何？’

“婆罗门言：‘宜速往彼。’

“王即携剑，往彼苑中，立瞻卜树下，告婆罗门言：‘我今舍头，汝来截之。’

“婆罗门曰：‘王不自断，令我持刃，非布施行。’

“时，有护苑天人见是事已，悲泣涕泪，告婆罗门曰：‘汝大恶人！月光天子慈愍一切，普利群生，何以此处害天子命？’

“王告天人：‘莫作是言，障碍胜事。我于过去无量生中，为大国王，于此苑内，千度舍头，时诸天人皆无障碍。昔济饿虎，舍身命等，超于慈氏四十劫，彼时天人亦无障碍。汝于今日，发随喜心，当获胜利。’

“月光天子复告天龙八部一切贤圣：‘我今舍头，不求轮王，不求生天，不求魔王，不求帝释，不求梵王，为求无上正等正觉，令未受化者回心受化，已受化者速得解脱，得解脱者圆证寂灭究竟彼岸。又愿命终之后，舍利如白芥子，于摩尼宝藏苑，建一大塔，令一切众生，礼拜供养见闻随喜，命终之后，皆得生天，发菩提心，出生死界。’

“发是愿已，婆罗门曰：‘王舍内财，甚为稀有，于未来世，速成佛道。’作是语时，王以首发，系无忧树枝，即执利剑，自断其头。

“尔时，三千大千世界六种震⁴动，于虚空中，天人赞言：‘善哉！善哉！今月光天子当得成佛。’复雨优钵罗华、钵纳摩华、俱母那华、曼陀罗华，及沈香、栴香、栴⁵檀之香，种种供养；即以栴⁶檀香木，焚烧遗体，收其舍利，于摩尼苑及四衢路，各起一塔，恒时供养。现在、未来一切众生，于此苑中，行住坐卧，及于塔前瞻礼供养，命终之后，生六欲天及梵天上。”

尔时，佛告诸苾刍：“往昔月光天子者，今我身是；大月、持地二辅相者，今舍利弗、大目乾连是；恶眼婆罗门者，今提婆达多是。由是因缘，先于佛前，而请入灭。”

时，诸苾刍闻佛所说，皆大欢喜，信受奉行，礼佛而退。

佛说月光菩萨经

⁴ 大正藏：振

⁵ 大正藏：旃

⁶ 大正藏：旃

● 结诵仪

补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

回向偈

(一遍)

诵经功德殊胜行 无边胜福皆回向
普愿沉溺诸有情 速往无量光佛刹
十方三世一切佛 一切菩萨摩诃萨
摩诃般若波罗蜜

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

三皈依

(一遍)

自皈依佛，当愿众生，体解大道，发无上心。
自皈依法，当愿众生，深入经藏，智慧如海。自
皈依僧，当愿众生，统理大众，一切无碍，和南
圣众。



此咒置经书中可灭误跨之罪

南无护法韦驮尊天菩萨

